

Na osnovu člana 5. i člana 29. Zakona o Vladi Tuzlanskog kantona ("Službene novine Tuzlanskog kantona", br. 17/00, 1/05 i 11/06), a u vezi sa članom 29. Zakona o izvršenju Budžeta Tuzlanskog kantona za 2008. godinu ("Službene novine Tuzlanskog kantona", broj: 14/07), Vlada Tuzlanskog kantona na sjednici održanoj dana 18.04. 2008. godine, donosi:

O D L U K U

o utvrđivanju uslova, kriterija i postupka za izbor i sufinansiranje programa i projekata udruženja iz Budžeta Tuzlanskog kantona za 2008. godinu

Član 1.

Ovom Odlukom utvrđuju se uslovi, kriteriji i postupak za izbor i sufinansiranje programa i projekata udruženja iz sredstava Budžeta Tuzlanskog kantona za 2008. godinu sa potrošačke jedinice 11010009 "Organizacije i udruženja Tuzlanskog kantona" u ukupnom iznosu od 616.990,00 KM.

Član 2.

Sredstva za sufinansiranje programa i projekata iz člana 1. ove Odluke dodjeljuju se udruženjima koja su registrovana u Ministarstvu pravosuđa i uprave Tuzlanskog kantona, kao i udruženjima koja su registrovana u skladu sa zakonom na entitetskom ili državnom nivou, a koja imaju sjedište, djeluju, rade i implementiraju projekte na području Tuzlanskog kantona (u daljem tekstu : Kanton).

Član 3.

Sredstva za programe i projekte udruženja iz člana 1. ove Odluke dodjeljuju se na osnovu javnog poziva.

Član 4.

Javni poziv iz člana 3. ove Odluke objavljuje se u dnevnim novinama, RTV TK i na zvaničnoj Web stranici Vlade Kantona, www.vladatk.kim.ba.

Prijave na javni poziv iz stava 1. ovog člana dostavljaju se u roku od 15 dana od dana objavljivanja u dnevnim novinama.

Član 5.

Udruženje podnosi prijavu na javni poziv tako što popunjava Prijavni obrazac čiju sadržinu propisuje Vlada Kantona i koji čini sastavni dio ove Odluke.

Prijavni obrazac se može preuzeti na Web stranici Vlade Kantona (www.vladatk.kim.ba) ili na pisarnici zajedničkih službi kantonalnih organa.

Prijavni obrazac se podnosi u zapečaćenoj koverti, a predaje putem pošte ili na pisarnicu zajedničkih službi kantonalnih organa.

Uz ispunjen Prijavni obrazac udruženje obavezno prilaže :

- Rješenje o upisu u Registar udruženja kod Ministarstva pravosuđa i uprave Tuzlanskog kantona ili drugog nadležnog organa u Federaciji Bosne i Hercegovine ili Bosni i Hercegovini [iz kojeg je vidljivo sjedište udruženja na području Tuzlanskog kantona] (original ili ovjerena kopija),
- Uvjerenje o poreznoj registraciji [Identifikacioni broj iz registra poslovnih subjekata] (original ili ovjerena kopija),
- Spesimen potpisa iz banke osoba odgovornih za finansije u udruženju ili kopiju ugovora s bankom o otvaranju transakcijskog računa [ugovor sadrži ID broj udruženja i imena ovlaštenih osoba] (original ili ovjerena kopija),
- Relevantan dokaz da je udruženje obezbijedilo dio sredstava iz drugih izvora za projekat/program sa kojim se aplicira [npr: Izvod iz banke o uplaćenim sredstvima na ime projekta/programa; Odluka o odobravanju sredstava sa jasno iskazanim iznosom sredstava na ime projekta/programa i sl.] .

Član 6.

Prijave udruženja na javni poziv koje ne budu dostavljene u skladu sa članom 5. ove Odluke neće biti razmatrane.

Prijave udruženja na javni poziv, korisnika sredstava iz 2007. godine sa pozicije "Organizacije i udruženja TK" koji nisu dostavili odgovarajući izvještaj o utrošku sredstava, neće biti razmatrane.

Član 7.

Udruženje ima pravo na javni poziv prijaviti najviše dva (2) projekta.

Maksimalan iznos koji se udruženju može odobriti po jednom projektu je 20.000,00 KM.

Maksimalan iznos koji se udruženju može odobriti putem javnog poziva je 40.000,00 KM.

Član 8.

Sredstva planirana u Budžetu Kantona za ove namjene, raspodjeljuju se prvenstveno udruženjima čiji se programi i projekti odnose na :

1. zaštitu i promociju ljudskih prava i prava djeteta,
2. aktivnosti i podršku mladima,
3. smanjenje nezaposlenosti, socijalnu zaštitu, zaštitu civilnih žrtava rata i zaštitu porodice sa djecom,
4. promociju volonterskog i humanitarnog rada i lokalnih građanskih inicijativa,
5. izvaninstitucionalno obrazovanje – prekvalifikacije, doškolovanje, te razvoj socijalnog poduzetništva,
6. demokratizaciju i razvoj civilnog društva,
7. unapređenje kvaliteta življenja, zaštite i očuvanje zdravlja i životne sredine,
8. zaštitu i očuvanje kulturne baštine naroda i nacionalnih manjina u BiH i promociju njihovih kulturnih djelatnosti,
9. promociju javnih potreba tehničke kulture,
10. izdavačku djelatnost udruženja (izdavanje publikacija).

Prilikom procjene neće se razmatrati programi i projekti koji:

- su usmjereni ka vjerskim ciljevima i aktivnostima,
- se isključivo baziraju na investicijskim ulaganjima, izgradnji i adaptaciji objekata, kupovini opreme,
- se isključivo odnose na jednokratne manifestacije .

Član 9.

Prijedlog programa raspodjele sredstava daje Komisija za pitanja organizacija i udruženja Tuzlanskog kantona (u daljem tekstu : Komisija) imenovana od strane Vlade Kantona.

Komisija zadržava pravo da se, na osnovu broja prijava koje ispunjavaju sve potrebne uslove javnog poziva, odredi o broju podržanih projekata jednog udruženja, shodno uslovima iz člana 7. ove Odluke.

U obradi prijava i utvrđivanju uslova, u skladu sa općim i posebnim kriterijima iz ove Odluke, Komisiji u radu pomaže Radna grupa imenovana od strane Komisije.

Komisija vrši raspodjelu sredstava cijeneći pri tome slijedeće kriterije:

- vezanost projekta za oblasti navedene u članu 8. ove Odluke,
- ciljevi projekta su specifični, dostižni, mjerljivi, realistični i vremenski određeni,
- adekvatna stručna zastupljenost u realizaciji projekta,
- inovativni aspekt projekta,
- samoodrživost projekta,
- uključenje i angažovanje većeg broja volontera u projekat,
- jasno definisane ciljne grupe,
- projektne aktivnosti uključuju društveno marginalizirane grupe,
- očekivani rezultati projekta su izraženi kroz kvalitetne indikatore,
- partnerski odnos sa drugom nevladinom organizacijom ili institucijom iz javnog sektora u realizaciji projekta,
- administrativni troškovi na projektu ne prelaze 30% ukupnog budžeta projekta.

Prilikom odabira projekata svaki kriterij pojedinačno će biti razmatran i vrednovan.

Član 10.

Komisija je dužna da u skladu sa kriterijima iz člana 9. ove Odluke, u roku od 30 dana, izvrši odabir projekata i sačini prijedlog programa raspodjele sredstava za udruženja.

Program raspodjele sredstava za udruženja donosi Vlada Kantona na prijedlog Komisije.

O programima / projektima koji su odbijeni Komisija je obavezna obavijestiti podnosioca zahtjeva uz obrazloženje u roku od 15 dana od dana donošenja Programa iz stava 2. ovog člana.

Član 11.

U roku od 15 dana od dana donošenja Programa raspodjele sredstava iz člana 10.ove Odluke, u ime Vlade Kantona, Premijer Kantona ili po ovlaštenju predsjednik Komisije, zaključuje ugovore sa udruženjima o sufinansiranju programa/projekata, kojim će se regulisati međusobna prava, obaveze i odgovornosti.

Član 12.

Komisija podnosi Vladi Kantona izvještaj o realizaciji sredstava iz Budžeta Kantona namijenjenih organizacijama i udruženjima, po javnom pozivu za tu godinu. Izvještaj se podnosi u prvom kvartalu naredne godine za prethodnu godinu.

Član 13.

Odluka stupa na snagu danom donošenja i bit će objavljena u “Službenim novinama Tuzlanskog kantona”.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

PREMIJER KANTONA

mr. sc. Enes Mujić

Broj: 02/1-
Tuzla, 18.04.2008. godine